



7. november 2022

UKA 2022/94

Aalajangiiffigisassatut siunnersuut, Upernavimmi Uummannamilu, nunaqarfiillu eqqaaniittuni eqqaaveqarneq pillugu Naalackersuisut nalunaarusiussasut, nalunaarusiaq agguaanneqassaaq UKA 2023-imi. Nalunaarummi erseqqissarneqarsimassaaq, eqqakkanik isumaginninneq qanoq innaallagiaqarnikkullu iluaqutaasinnaasunik sanaartussagaanni, qanorlu aningaasaqarnikkut kinguneqassanersoq.

(Inatsisartunut ilaasortaq Aqqalu C. Jerimiassen, Atassut)

Siumumiit inatsisartunut ilaasortaq siunnersuutaanut qutsavigaarput imatullu oqaaseqaateqassaagut.

Siumumiit ilisimalluarparput eqqaaveqarnikkut eqqagassatigullu annertuumik pingaartumillu siunnersuuteqartup qulequtsiussaani piffinni pineqartuni ajornartorsiuteqartoqarnera. Piffissallu ingerlanerani Avannaata Kommuniani ajornartorsiutaasut pimoorullugit aqqiivigineqartuarnissaat siunertaralugu sulinerit ingerlanneqartuartartut eqqarsaatigalugit. Tamatuma tungaagut suliat aqqiissutaasussanik siunertaqartut piusarmata, tamannalu ilungersuullugu suliarineqartartoq ilisimagatsigu annerusumik uparuagassaqarfiginngilarput.

Ajornartorsiutit pilerfii ilaatigut ukuusinnaasarpud tassa; nunaqarfinni sulisussatigut ajornartooqqasarneq, aammattaarli aqqusinertigut pitsaasuunngitsutigut qamutit motorillit atorneqartut sukkaasumik aserfallattarnerat pissutsinut ajornartoorfinnut qitiulluinnartut ilagigaat ilisimavarput.

Siunnersuuteqartup tunngavilersuutai ajornartorsiutit eqqarsaatigalugit tassungalu Kommunip pineqartup pilersaarusiornissaa, qanorlu isummersornissaa pillugu tulluurtutuut isigaarput. Tamatuma utaqqineqarnissaa pissasoq, tamannalu pereerpat tulluarnepaassaaq alloriarnerit tulluuttut pissappata, tassa Kommunip nammineq isummereernerata kingunerisaanik sumut tikkuussinerat apeqqutaalluni siunnerfia ataqqilluinnarneqartariaqartut isigigatsigu.

Naalackersuisut akissuteqaataanni ersippoq suliniutit Kommune peqatigalugu ingerlanneqartut, ilaatigullu eqqakkanik poortorneqarsimasunik piffimmut aallertoqartussaasoq taaneqarmat taamatut suleriartoqarsimanagera iluarisimaarparput. Neriutigaarpullu taamatut suleriartoqarnera ataavartumik ingerlanneqarsinnaalissasoq siunissaq eqqarsaatigalugu.

Naalackersuisut akissutaanni maluginiarparput Kommuni eqqagassanut pilersaarummik sukumiisumik imalimmik suliaqartussaasoq. Ilaatigut qulequttami inoqarfiit pineqartut

ilanngullugit isumagineqarnissaat allaaserineqartussaalluni. Tamanna isumalluarfiusariaqarpoq Kommunimi tassaavoq piffinni pineqartuni tamanit pissutsinik ilisimasaqarnerpaasoq. Tamannalu qularutigingilarput atorluarlugu pitsaasumik suliaqarumaartoq.

Siumumiit eqqagassanut, eqqaaveqarnernut tunngasut Kommuniniit akisussaaffigineqarnerat ataqqilluinnarparput. Taamaattumillu Avannaata Kommunia Esani A/S-imut ilaassanersoq. Ilaassannginnersorlu pillugu qulaaniit akulerunnissaq inissaminiingitsutut isigalutigu, tassa Avannaata Kommunia nammineerluni aalajangertariaqarpoq Esani A/S-imut ilanngunniarnerluni imaluunniit naamik. Tassanngalu isummernissaa pissangalluta utaqqissuarput. Nukingernartutulli immat kaammattuutiginarpoq piaartumik isummertoqarnissaa.

Siunnersuuteqartoq ilumoorpoq sikusartumiinneq arlaagut unammilligassanik imaannaanngitsunik pilersitsiffiusinnaasoq oqarmat, tamannalu pillugu Kommuni sallahsaalluni iliuusaasinnaasunik saqqummiisariaqartoq pissutsinullu qanoq pitsaanerusunik aaqqissutaasinnaasunik tikkuussisariaqartoq isumaqarpugut. Taamaasilluni nalorninaannerusumik ilisimaneqartariaqassammat iliuusaasinnaasut piffinni inoqarfinni siammasissumi inissimasuni sutigut unammillernartoqarnerisut, aammalu siunissami aqqusinertigut assartuisarnissani qanoq annertutigisumik aaqqissuussisoqartussaanageranik tikkuussisumik pilersaarusiassami ilaatitsisoqartariaqartoq isumaqarfigigatsigu.

Naggataagut erseqqissaatigissuarput soorunami avatangiisitta pitsaanerpaamik paarineqarnissaa pingaartilluinnaratsigu. Taamaattumillu maaniinnaq ikuallaasarnarit sapinngisamik atorunnaartariaqarivut isumaqaratta. Tamanna ornikkipput nalunngilarput, tamatumunngalu siunertamat ataatsimoornissarput pingaartuuvoq tamattami soqutigaarput peqqinnarnerusumik ulluinnarni inuusaatsitta pitsanngorsartuarnissaa tamatta pisariaqartikkatsigu.

Tamaattumik Kommuni ersarissumik isummeqqaartariaqartoq isumaqarfigaarput. Taamatuttaaq qanimut naalakkersuinikkut suleqatigiittoqarnissaa kaammattuutigalutigu, soorunamilu Kommunimi isummernissami qulequttami uani pineqartut tikiqqanngitsoornavianngimmata tamatuma Kommunalbestyrelsimi eqqartorneqarnissaani sakkussat ilaattut atorluarneqarsinnaasutut atornerqarumaartut neriuutigaarput. Kisiannili erseqqissaqqissavarput Kommune pineqartoq isummeqqaarli ,tassanngaanniillu suliniarnerit tulliuttut aallartinneqarlutik.

Tamannalu pillugu Naalakkersuisut inassuteqaataat ilalerparput siunnersuut itigartinneqassasoq,ersarissassalluguli suliat taakkartorneqartut ingerlareermata pitsaanerpaamillu aaqqiinarneq suleqatigiilluni ingerlassasoq naatsorsuutigalutigu.

Jens Kristian Therkelsen, Siumut